

গণপ্রজাতন্ত্রী বাংলাদেশ সরকার
বাণিজ্য মন্ত্রণালয়
বিশ্ব বাণিজ্য সংস্থা সেল
বিজ্ঞপ্তি

তারিখ:

নং ২৬.০০.০০০.১৩৩.৯৩.০২৬.১৯.—নির্দেশক্রমে জানানো যাচ্ছে যে, সরকার এতদসঙ্গে যুক্ত
“ডিজিটাল কমার্স পরিচালনা নির্দেশিকা ২০২১” অনুমোদন করেছেন তা এতদ্বারা প্রকাশ করা
হলো।

২.০ “ডিজিটাল কমার্স পরিচালনা নির্দেশিকা ২০২১” অবিলম্বে কার্যকর হবে।

নাম

পদবী

প্রস্তাবনা:

জাতীয় ডিজিটাল কমার্স পলিসি ২০২০ (সংশোধিত) এর অনুচ্ছেদ ৩.৩.৬ অনুসারে এ “ডিজিটাল কমার্স পরিচালনা নির্দেশিকা ২০২১” প্রণয়ন করা হলো।

গণপ্রজাতন্ত্রী বাংলাদেশ সরকার
বাণিজ্য মন্ত্রণালয়

ডিজিটাল কমার্স পরিচালনা নির্দেশিকা ২০২১

অধ্যায়-১

নির্দেশিকার নাম, পরিধি ও সংজ্ঞা

১.১ সংক্ষিপ্ত শিরোনাম, প্রয়োগ ও প্রবর্তন

“জাতীয় ডিজিটাল কমার্স (সংশোধিত) নীতিমালা ২০২০” এর অনুচ্ছেদ ৩.৩.৬ অনুসারে এ “ডিজিটাল কমার্স পরিচালনা নির্দেশিকা ২০২১” প্রণয়ন করা হলো।

ক. সংক্ষিপ্ত শিরোনাম: “ডিজিটাল কমার্স পরিচালনা নির্দেশিকা ২০২১” নামে অভিহিত হবে।

খ. প্রয়োগ: এটি সমগ্র বাংলাদেশে প্রয়োগ হবে।

গ. প্রবর্তন: এটি অবিলম্বে কার্যকর হবে।

১.২ সংজ্ঞা: বিষয় বা প্রসঙ্গের পরিপন্থি কিছু না থাকলে এ নির্দেশিকা-

১.২.১ মার্কেটপ্লেস - অনলাইন প্ল্যাটফর্ম যেখানে ক্রেতা বিক্রেতাগণ ভারুয়ালি পণ্য ও সেবা প্রদর্শন, যাচাই-বাছাই এবং ক্রয় বিক্রয় করে থাকেন।

১.২.২ পণ্য -পণ্য অর্থ কাচামাল, উত্পাদিত দ্রব্য ও যন্ত্রপাতি এবং কঠিন, তরল বা বায়বীয় আকারে পণ্যদ্রব্য যা হস্তান্তর করা যায় এবং মানুষের প্রয়োজন মেটায়।

১.২.৩ সেবা অর্থ পণ্য সংশ্লিষ্ট সেবা, ভৌত সেবা বা বুদ্ধিবৃত্তিক ও পেশাগত সেবাকে বুঝাবে যার উপযোগিতা আছে কিন্তু দ্রব্যের মত হস্তান্তর যোগ্য নয়।

১.২.৪ ওয়ারেন্টি হলো এক ধরনের চুক্তি যা বিক্রেতা বা উৎপাদনকারী এবং ক্রেতা বা ভোক্তার মধ্যে সম্পাদিত হয় যেখানে পণ্য বা সেবার নির্দিষ্ট গুণাবলী বা স্থায়ীত্বের নিশ্চয়তা প্রদান করা। চুক্তিতে বর্ণিত গুণাবলী, উপযোগিতা বা স্থায়ীত্ব না পাওয়া গেলে ক্রেতা বা ভোক্তাকে ভর্তুকি বা মূল্য ফেরত অথবা মেরামত করে দেয়ার অঙ্গিকার করা হয়।

১.২.৫ গ্যারান্টি হলো বিক্রেতা বা উৎপাদনকারী কর্তৃক ভোক্তা বা ক্রেতাকে প্রদত্ত পণ্য বা সেবার মান, কার্যকারিতা বা উপযোগিতা বিষয়ক প্রতিশ্রুতি।

১.২.৬ ভেজাল পণ্য- নিরাপদ খাদ্য আইন ২০১৩ অনুসারে সংগায়িত ভেজাল পণ্য বা সেবাকে বোঝাবে।

১.২.৭ নকল পণ্য- ট্রেডমার্ক আইন অনুযায়ী রেজিস্ট্রিকৃত কোন পণ্য বা সেবা ট্রেডমার্ক সংশ্লিষ্ট প্রস্তুতকারী বা তার নিয়োজিত বা অনুমোদিত কোন প্রতিষ্ঠান ব্যতিত অন্য কেহ উৎপাদন ও বাজারজাত করলে সেই সকল পণ্য বা সেবাকে নকল পণ্য বা সেবা হিসেবে গণ্য করা হবে।

১.২.৮ ডিজিটাল ওয়ালেট অর্থ এমন এক আধার যেখানে ইলেকট্রনিক মুদ্রা সংরক্ষিত থাকে।

অধ্যায়-২

লক্ষ্য ও উদ্দেশ্য

২.১ লক্ষ্য: ডিজিটাল ক্রয়-বিক্রয়ে ক্রেতা-বিক্রেতার স্বার্থ সংরক্ষণের মাধ্যমে “জাতীয় কমার্স নীতিমালা ২০২০ (সংশোধিত) এর সফল বাস্তবায়নের জন্য অনুকূল পরিবেশ গড়ে তোলা।

২.২ উদ্দেশ্য

২.২.১ ডিজিটাল কমার্স পরিচালনায় স্বচ্ছতা, দায়বদ্ধতা ও জবাবদিহিতা নিশ্চিত করা।

২.২.২ ডিজিটাল ব্যবসার প্রসারের মাধ্যমে কর্মসংস্থান সৃষ্টি করা।

২.২.৩ ডিজিটাল ব্যবসায় শৃংখলা আনয়নের মাধ্যমে ভোক্তার আস্থা বৃদ্ধি করা।

২.২.৪ প্রতিযোগিতামূলক বাজার ব্যবস্থা গড়ে তোলার মাধ্যমে নতুন নতুন উদ্যোক্তা সৃষ্টি করা।

অধ্যায়-৩

মার্কেটপ্লেসে বিক্রয়যোগ্য পণ্য ও সেবার তথ্য প্রদর্শন ও ক্রয়-বিক্রয়

৩.১ সাধারণ নিয়মাবলী:

৩.১.১ দেশের সংশ্লিষ্ট সকল প্রচলিত আইন ডিজিটাল কমার্স পরিচালনার ক্ষেত্রে প্রযোজ্য হবে।

৩.১.২ ওয়েবসাইট, মার্কেটপ্লেস বা সামাজিক যোগাযোগ মাধ্যমে পণ্য ও সেবা ক্রয়-বিক্রয়ের জন্য উপস্থাপনের ক্ষেত্রে পণ্য সংশ্লিষ্ট সকল বিবরণ ও শর্তাবলি যেমন- পণ্য ও মূল্য ফেরতের শর্তাবলি, পরিবর্তন, সরবরাহের সময়সীমা ইত্যাদি বিষয়ে সকল শর্তাবলী সুস্পষ্টভাবে উল্লেখ করতে হবে।

৩.১.৩ ডিজিটাল কমার্স বা ই-কমার্সের মাধ্যমে মাল্টি লেভেল মার্কেটিং (এমএলএম) বা নেটওয়ার্ক ব্যবসায় পরিচালনা করা যাবে না।

৩.১.৪ ডিজিটাল মাধ্যমে নেশা সামগ্রী, বিস্ফোরক দ্রব্য, বা অন্য কোন নিষিদ্ধ সামগ্রী বা সেবা ক্রয়-বিক্রয় করা যাবে না।

৩.১.৫ ডিজিটাল মাধ্যমে ঔষধ ক্রয়-বিক্রয়ের ক্ষেত্রে ঔষধ প্রশাসন অধিদপ্তরের লাইসেন্স গ্রহণ করতে হবে। অনুরূপভাবে কোন দাহ্য প্রদার্থ ক্রয় বিক্রয়ের ক্ষেত্রেও বিস্ফোরক অধিদপ্তরের লাইসেন্স গ্রহণ করতে হবে।

৩.১.৬ বিক্রেতার ওয়েবসাইটে কোন বিশেষ সফটওয়্যার বা **Cookies** থাকলে তা ক্রেতাকে পূর্বেই অবহিত করতে হবে।

৩.১.৭ ক্রয়-বিক্রয়কালে কোন ব্যক্তিগত তথ্য সংগ্রহ করার প্রয়োজন হলে কী কী তথ্য সংগ্রহ করা হবে, তথ্য কোথায় সংরক্ষিত থাকবে, পরবর্তিতে কোথায় ব্যবহৃত হবে

এবং কী প্রক্রিয়ায় তা প্রসেস করা হবে তা জানিয়ে ক্রেতার পূর্বানুমতি গ্রহণ করতে হবে। ব্যক্তিগত তথ্য সংগ্রহের বিষয়ে টার্মস এন্ড কন্ডিশন ক্রেতা দেখেছেন তা নিশ্চিত হওয়ার জন্য ওয়েব সাইটে চেকবক্স (Checkbox) এর ব্যবস্থা থাকতে হবে।

৩.১.৮ পণ্য বা সেবা বিক্রয়ের জন্য বা প্রসারের জন্য কোন ধরনের লটারী বা এ জাতীয় কোন ব্যবস্থা গ্রহণ করা যাবে না।

৩.১.৯ সকল ধরনের ডিজিটাল ওয়ালেট, গিফ্ট কার্ড, ক্যাশ ভাউচার বা অন্য কোন মাধ্যম যা অর্থের বিকল্প হিসাবে ব্যবহৃত হতে পারে তা বাংলাদেশ ব্যাংকের অনুমতি ব্যতিরেকে তৈরী, ব্যবহার বা ক্রয়-বিক্রয় করা যাবে না।

৩.১.১০ বাংলাদেশ ব্যাংকের অনুমতি ব্যতিরেকে ডিজিটাল মাধ্যমে কোন ধরনের অর্থ ব্যবসা পরিচালনা করা যাবে না।

৩.১.১১ ক্রেতাকে প্রত্যক্ষ বা পরোক্ষভাবে কোন পণ্য ক্রয়ের জন্য বাধ্য করা যাবে না।

৩.১.১২ সকল ডিজিটাল কমার্স ব্যবসায়ীকে ট্রেড লাইসেন্স/ভ্যাট নিবন্ধন/TIN/UBID/PRA গ্রহণ করতে হবে।

৩.১.১৩ সচ্ছতার জন্য ব্যবসায় লেনদেন সংক্রান্ত সকল তথ্যাদি সংরক্ষণ করতে হবে এবং সরকারের দায়িত্বপ্রাপ্ত যে কোন সংস্থা চাহিবামাত্র তা সরবরাহ করতে হবে।

৩.১.১৪ মার্কেটপ্লেস এর স্বত্বাধিকারী তার তালিকাভুক্ত বিক্রেতার বিক্রয়কৃত পণ্যের দাম বুঝে পাওয়ার সর্বোচ্চ ১০ (দশ) দিনের মধ্যে প্রযোজ্য কমিশন ও ডেলিভারি চার্জ কেটে রেখে সংশ্লিষ্ট তালিকাভুক্ত বিক্রেতাকে পুরো দাম পরিশোধ করতে হবে। তবে মার্কেটপ্লেস এর স্বত্বাধিকারী ও বিক্রেতা বা মার্চেন্ট এর মধ্যে ভিন্নতর কোন চুক্তি থাকলে সে অনুযায়ী পাওনা পরিশোধ করা যাবে।

৩.১.১৫ মার্কেটপ্লেস এর মালিক নয় এমন বিক্রেতা বা মার্চেন্ট এর পণ্য বা সেবা বিক্রয়ের জন্য উপস্থাপনের পূর্বে মার্কেটপ্লেস কর্তৃপক্ষ ও বিক্রেতা বা মার্চেন্ট এর মধ্যে একটি চুক্তি সম্পাদন করতে হবে। চুক্তি সম্পাদনের সময় মার্কেটপ্লেস কর্তৃপক্ষ বিক্রেতা বা তার যোগ্য প্রতিনিধির নাম, ছবি, জাতীয় পরিচয়পত্র, মোবাইল নাম্বার, ঠিকানা ইত্যাদিসহ পূর্ণাঙ্গ তথ্য সংরক্ষণ করার ব্যবস্থা নিবে।

৩.১.১৬ ডিজিটাল কমার্স মার্কেটপ্লেস বা ফেইসবুক পেইজে ক্রয়-বিক্রয়, মূল্য ফেরত, পণ্য ফেরত বা পণ্য পরিবর্তন, ডেলিভারী পদ্ধতি, ডেলিভারীর সময় এবং অন্যান্য শর্তাবলী বাংলায় লিখা থাকতে হবে এবং স্পষ্টভাবে তা প্রদর্শন করতে হবে।

৩.২ মার্কেটপ্লেসে পণ্য বা সেবা বিক্রয়ের জন্য উপস্থাপন

৩.২.১ মার্কেটপ্লেসে বিক্রয়যোগ্য পণ্য বা সেবার যথাযথ বিবরণ, যেমন, পণ্যের পরিমাপ, উপাদান, রং, আকৃতি, গুণগতমান ইত্যাদি, মূল্য এবং ডেলিভারীসহ অন্যান্য চার্জ যদি থাকে তা সুস্পষ্টভাবে উল্লেখ করতে হবে। পণ্য বা সেবাকে চিহ্নিত করার জন্য পরিপূর্ণ বর্ণনা যা পণ্য বা সেবাকে চিহ্নিত করতে সক্ষম এমন তথ্যাদি প্রদান করতে হবে।

৩.২.২ সুস্পষ্টতার জন্য বাস্তবসম্মত হলে পণ্যের ছবি, ভিডিও, রং, আকৃতি, পরিমাপ, ওজন, উপাদান ইত্যাদি এবং সেবার ক্ষেত্রে সেবার ধরন, সেবা প্রদান পদ্ধতি, পরিমাপ যোগ্যতা (যদি থাকে) ইত্যাদি তথ্য প্রদান করতে হবে। পণ্যের বিস্তারিত বিবরণ (ব্র্যান্ড, মডেল, ডেলিভারি সময়, **country of origin** ইত্যাদি) ক্রেতাদের জন্য দিতে হবে যাতে ক্রেতা জেনে বুঝে cY" বা সেবা ক্রয় করতে পারে।

- ৩.২.৩ পণ্যের ক্ষেত্রে পণ্যের উপাদান ও উপাদানের পরিমাণ, রাসায়নিক গঠন (সম্ভব হলে) ইত্যাদি বিস্তারিত বিবরণ প্রদান করতে হবে।
- ৩.২.৪ পণ্য ব্যবহারে মানুষ ও প্রাণির স্বাস্থ্যের জন্য ঝুঁকিপূর্ণ বা পরিবেশের জন্য ক্ষতিকর কিছু রয়েছে কিনা অথবা শিশুদের জন্য স্বাস্থ্য ঝুঁকি রয়েছে কিনা তা স্পষ্টভাবে উল্লেখ করতে হবে।
- ৩.২.৫ যে সকল পণ্যের ক্ষেত্রে কোন মান নিয়ন্ত্রণকারী কর্তৃপক্ষের সনদ গ্রহণের বাধ্যবাদকতা রয়েছে সে সকলক্ষেত্রে সনদের উল্লেখ থাকতে হবে।
- ৩.২.৬ মেয়াদ উত্তীর্ণ পণ্য বা দ্রব্য সামগ্রী বিক্রয় বা সরবরাহ করা যাবে না।
- ৩.২.৭ মেধাস্বত্ব সংরক্ষণের নিয়ম যথাযথভাবে প্রতিপালন করতে হবে।
- ৩.২.৮ কোন নকল বা ভেজাল পণ্য প্রদর্শন বা বিক্রয় করা যাবে না।
- ৩.২.৯ বিক্রয়ের জন্য প্রদর্শিত পণ্য বিক্রেতা বা তার সাথে চুক্তিবদ্ধ ব্যক্তি বা প্রতিষ্ঠানের নিয়ন্ত্রণে থাকতে হবে এবং বিজ্ঞপ্তিতে কী পরিমাণ পণ্য স্টকে রয়েছে তা উল্লেখ করতে হবে এবং প্রতিটি বিক্রয় প্রক্রিয়া সম্পন্ন হওয়ার সাথে সাথে উক্ত পণ্যের স্টক হালনাগাদ করতে হবে। বিক্রয়ের জন্য প্রদর্শিত পণ্য বিক্রেতা বা তার সাথে চুক্তিবদ্ধ ব্যক্তি বা প্রতিষ্ঠানের নিয়ন্ত্রণে না থাকলে স্পষ্টভাবে “স্টকে নেই” বা “Stock out” কথাটি স্পষ্টভাবে পণ্যের পাশে লিপিবদ্ধ থাকতে হবে এবং এ ক্ষেত্রে অনুচ্ছেদ ৩.২.১০ এ বর্ণিত অবস্থা ব্যতিরেকে কোন ধরনের পেমেন্ট গ্রহণ করা যাবে না।
- ৩.২.১০ অগ্রিম মূল্য আদায়ের ক্ষেত্রে প্রদর্শিত পণ্য অবশ্যই দেশের ভিতরে 'রেডি টু শিপ' (মার্কেটপ্লেসের নিজস্ব নিয়ন্ত্রণে বা মার্কেটপ্লেসে নিবন্ধিত থার্ড পার্টি বিক্রেতার নিয়ন্ত্রণে) পর্যায়ে থাকতে হবে। সম্পূর্ণ মূল্য গ্রহণের পরবর্তি ৭২ ঘন্টার মধ্যে ডেলিভারী পারসন বা প্রতিষ্ঠানের হস্তান্তর করার মত অবস্থায় নেই এমন পণ্যের ক্ষেত্রে

পণ্যমূল্যের ১০% এর বেশি অগ্রিম গ্রহণ করা যাবে না। তবে বাংলাদেশ ব্যাংক অনুমোদিত এসক্রো সার্ভিস এর মাধ্যমে ১০০% পর্যন্ত অগ্রিম গ্রহণ করা যাবে।

৩.২.১১ কোন ধরনের অফার, ডিসকাউন্ট, ফ্রি ডেলিভারি বা অন্য কোন সুবিধা থাকলে তা পরিষ্কারভাবে পণ্যের বর্ণনায় থাকতে হবে।

৩.২.১২ কোন তৃতীয় পক্ষ বা মার্চেন্ট এর পণ্য বা সেবা ওয়েবসাইটের মাধ্যমে বিক্রয় হলে বিক্রেতা প্রতিষ্ঠান বা ব্যক্তির নাম ও যোগাযোগের ঠিকানা, ফোন নম্বর, ই-মেইল ইত্যাদি ওয়েবসাইটে সুস্পষ্টভাবে উল্লেখ থাকতে হবে।

৩.৩ পণ্য ডেলিভারী

৩.৩.১ বিক্রয়ের জন্য প্রদর্শিত পণ্যের সম্পূর্ণ মূল্য পরিশোধের পরবর্তি ৪৮ ঘন্টার মধ্যে পণ্য বা পণ্য সামগ্রী ডেলিভারীম্যান বা ডেলিভারী সংস্থার নিকট হস্তান্তর করতে হবে এবং ক্রেতাকে তা টেলিফোন, ই-মেইল বা এসএমএস এর মাধ্যমে জানাতে হবে। এক্ষেত্রে ডেলিভারী সংস্থা বা মার্কেটপ্লেস ড্র্যাকিং সিস্টেম ব্যবহার করার উপর গুরুত্ব দেয়া হবে।

৩.৩.২ সম্পূর্ণ মূল্য পরিশোধের ক্ষেত্রে ক্রেতা ও বিক্রেতা একই শহরে অবস্থান করলে ক্রয়াদেশ গ্রহণের পরবর্তি সর্বোচ্চ ০৫ (পাঁচ) দিন এবং ভিন্ন শহরে বা গ্রামে অবস্থিত হলে সর্বোচ্চ ১০ (দশ) দিনের মধ্যে পণ্য ডেলিভারী প্রদান করতে হবে।

৩.৩.৩ নিত্য প্রয়োজনীয় দ্রব্যের ক্ষেত্রে ডেলিভারীর সময় আরও সংক্ষিপ্ত হবে এবং ক্রেতাকে তা ক্রয়াদেশ গ্রহণের সময় সুস্পষ্টভাবে অবহিত করতে হবে।

৩.৩.৪ কোন একটি ক্রয়াদেশ (purchased order) এ একাধিক পণ্য থাকলে পণ্যের জন্য আলাদা আলাদা ডেলিভারী চার্জ আরোপ করা যাবে না। তবে মার্কেটপ্লেসে

পণ্যের বিক্রেতা বা মার্চেন্ট ভিন্ন ভিন্ন হলে আলাদা আলাদা ডেলিভারী চার্জ গ্রহণ করা যাবে। তবে এ ক্ষেত্রে ক্রেতাকে ক্রয়াদেশ নিশ্চিত করার পূর্বেই আবহিত করতে হবে।

৩.৩.৫ পণ্য বিক্রয় ও সরবরাহের ক্ষেত্রে মার্কেটপ্লেসে প্রদর্শিত পণ্যের মান ও সঠিকতা মার্কেটপ্লেসের স্বত্তাধিকারী নিশ্চিত করবে। তবে বিক্রেতা বা মার্চেন্ট এর সাথে ভিন্নতর চুক্তি থাকলে সে মোতাবেক ব্যবস্থা নেয়া যাবে।

৩.৩.৬ সময়মত ডেলিভারী প্রদান এবং মালামালের সুরক্ষার জন্য বিক্রেতা প্রতিষ্ঠান ডেলিভারী প্রতিষ্ঠান বা ডেলিভারী পারসন এর সাথে প্রয়োজনীয় চুক্তি সম্পাদন করবে। এ ক্ষেত্রে প্রয়োজনীয় ইনস্যুরেন্স ব্যবস্থাও গ্রহণ করা যেতে পারে।

৩.৩.৭ পণ্য সরবরাহের সময় মুদ্রিত বিল প্রদান করতে হবে যাতে প্রদেয় বা প্রদত্ত ভ্যাট ও আয়কর (যদি থাকে) উল্লেখ থাকতে হবে ।

৩.৩.৮ যেসব পণ্যের ওয়ারেন্টি বা গ্যারান্টি আছে, তার জন্য ওয়ারেন্টি বা গ্যারান্টি পিরিয়ড ও সেবা প্রাপ্তির স্থান ও যোগাযোগের বিস্তারিতসহ অন্যান্য শর্ত সম্বলিত কার্ড বা ডিজিটাল কার্ড পণ্যের সাথে সরবরাহ করতে হবে।

৩.৩.৮ পচনশীল দ্রব্য দ্রুততম সময়ে ডেলিভারি দেয়ার ব্যবস্থা নিতে হবে এবং ডেলিভারির সময় যাতে পণ্যের কোন ক্ষতি না হয় সেজন্য মার্কেটপ্লেস কর্তৃপক্ষ যথোপযুক্ত ব্যবস্থা গ্রহণ করবে।

৩.৪ অভিযোগ ও প্রতিকার:

৩.৪.১ পণ্য ও সেবার বিষয়ে অভিযোগের জন্য মার্কেটপ্লেস কর্তৃপক্ষ যথাযথ ব্যবস্থা গ্রহণ করবে। অভিযোগ গ্রহণের জন্য প্রয়োজনীয় অ্যাপ বা প্ল্যাটফর্মে ফোন নাম্বার, ইমেইল বা অন্যান্য যোগাযোগের মাধ্যম স্পষ্টভাবে উল্লেখ করতে হবে। ক্রেতাগণ যাতে যে কোন বিষয়ে সার্বক্ষণিক যোগাযোগ করতে পারে, সেজন্য ক্রেতা সংখ্যার আনুপাতে কাস্টমার কেয়ার এর কর্মী নিয়োগ দিতে হবে।

৩.৪.২ কোন পণ্যের বা সেবা প্রদান বিষয়ে ক্রেতার অভিযোগ রেকর্ডের যথাযথ ব্যবস্থা রাখতে হবে এবং যেকোন অভিযোগ ৯৬ ঘন্টার মধ্যে সমাধানের ব্যবস্থা করে ক্রেতাকে ফোন, ই-মেইল বা এসএমএস এর মাধ্যমে জানাতে হবে।

৩.৪.৩ পণ্যের বা সেবার বিষয়ে ক্রেতা বা অন্য কারও রেটিং এবং মতামত জানানোর ব্যবস্থা ওয়েবসাইট, অ্যাপ কিংবা প্ল্যাটফর্মে রাখতে হবে যাতে ভবিষ্যতে ক্রেতারা পণ্যের ব্যাপারে অন্য ক্রেতাদের মতামত বা রিভিউ দেখে ক্রয়ের সিদ্ধান্ত নিতে পারে। বিক্রেতা প্রতিষ্ঠান (মার্কেটপ্লেস বা মার্চেন্ট) বা এর কোন স্টাফ বা বিক্রেতা প্রতিষ্ঠান বা মার্চেন্ট এর সাথে সংশ্লিষ্ট কেউ রিভিউ বা রেটিং এ অংশগ্রহণ করতে পারবেনা। এ রিভিউ মুছে ফেলা যাবে না।

৩.৪.৪ সম্পূর্ণ মূল্য পরিশোধের পর মানুষের নিয়ন্ত্রণ বহির্ভূত কোন কারণে (Force majeure) ক্রেতার চাহিদামতো পণ্য সরবরাহ করা সম্ভব না হলে, অর্ডার দেবার ৪৮ ঘন্টার মধ্যে ক্রেতাকে তা ফোন, এসএমএস, ই-মেইল বা অন্যান্য মাধ্যমে জানাতে হবে। এক্ষেত্রে অন্য কোন পণ্য ক্রয় করার জন্য প্রত্যক্ষ বা পরোক্ষভাবে বাধ্য করা যাবে না।

৩.৪.৫ এ নির্দেশিকার বিধান প্রতিপালনে ব্যর্থ হলে কর্তৃপক্ষ বিক্রেতা বা মার্কেটপ্লেস এর ট্রেড লাইসেন্স, কোম্পানি রেজিস্ট্রেশন, ভ্যাট নিবন্ধন ইত্যাদি বাতিল করাসহ সংশ্লিষ্ট মার্কেটপ্লেস নিষিদ্ধ করণসহ অন্যান্য আইনানুগ ব্যবস্থা গ্রহণ করতে পারবে।

৩.৪.৬ এ নির্দেশিকা প্রতিপালনে ব্যর্থ হলে ক্ষতিগ্রস্ত ব্যক্তি বা ক্রেতা বা কোন সরকারী বা বেসরকারী সংস্থা জাতীয় ভোক্তা অধিকার সংরক্ষণ অধিদপ্তরসহ অন্যান্য সংশ্লিষ্ট আদালতে আইনানুগ প্রতিকারের জন্য অভিযোগ দায়ের করতে পারবে।

৩.৫ অগ্রিম পরিশোধিত মূল্য সমন্বয়ঃ

৩.৫.১ ক্রেতা কোন মাধ্যমে (ডেবিট, ক্রেডিট কার্ড, ব্যাংক ট্রান্সফার, মোবাইল ব্যাংকিং, অন্যান্য) অগ্রিম মূল্য পরিশোধ করলে এবং বিক্রেতা কোন কারণে নির্ধারিত সময়ে সে পণ্য সরবরাহ করতে ব্যর্থ হলে মূল্য পরিশোধের সর্বোচ্চ ০৭ দিন (সংশ্লিষ্ট অর্থ প্রদানকারী মাধ্যমের ব্যবহৃত সময় ব্যতিত) এর মধ্যে ক্রেতার পরিশোধিত সম্পূর্ণ অর্থ যে মাধ্যমে ক্রেতা অর্থ পরিশোধ করেছেন সেই একই মাধ্যমে (ডেবিট কার্ড, ক্রেডিট কার্ড, ব্যাংক ট্রান্সফার, মোবাইল ফিন্যান্সিয়াল সার্ভিস ইত্যাদি) ফেরত প্রদান করতে হবে। এক্ষেত্রে কোন চার্জ থাকলে মার্কেটপ্লেস বা বিক্রেতাকে তা বহন করতে হবে। মূল্য ফেরতের বিষয়ে ক্রেতাকে ইমেইল, এসএমএস, ফোন বা অন্য মাধ্যমে অবহিত করতে হবে। তবে এ ক্ষেত্রে ক্রেতার পরিশোধিত মূল্যের অতিরিক্ত অর্থ প্রদান করা যাবে না।

৩.৫.২ যে কোন ধরনের ঘোষিত ডিসকাউন্ট বা ক্যাশব্যাক অফার বিক্রয় কার্যক্রম সম্পন্ন হওয়ার সাথে সাথে কার্যকর করতে হবে।

৩.৫.৩ ক্যাশব্যাক অফারে ঘোষিত অর্থ পণ্য বা সেবা বিক্রয় সম্পন্ন হওয়ার পর কোন ডিজিটাল কমার্স প্রতিষ্ঠানের ওয়ালেটে জমা রাখা যাবেনা।

৩.৫.৩ ডিজিটাল কমার্সে লেনদেনের ক্ষেত্রে বাংলাদেশ ব্যাংক অনুমোদিত “এসক্রো সার্ভিস” গ্রহণ করা যেতে পারে।
